



PEMANGKU Pengarah Belia dan Sukan memberikan kata-kata perangsang kepada perwakilan belia yang menyertai JENESYS 2019 sebelum berlepas ke Tokyo, Jepun.

Berita dan Foto : Mohamad Azmi Awang Damit

BERAKAS, Sabtu, 8 Februari.- Seramai 12 perwakilan belia yang terdiri daripada mahasiswa Institusi Pengajian Tinggi di



negara ini berlepas ke Tokyo, Jepun bagi menyertai JENESYS 2019 Inbound Program Students Conference yang akan diadakan selama sepuluh hari, bermula 9 hingga 18 Februari 2020.

Berada di Lapangan Terbang Antarabangsa Brunei bagi mengucapkan selamat belayar kepada perwakilan belia tersebut, Pemangku Pengarah Belia dan Sukan, Dayang Mariam binti Ulat.

Ketua Delegasi, Abdul Waaliummul Fadzl bin Haji Wahab semasa ditemu bual melahirkan

KETUA Delegasi, Abdul Waaliummul Fadzl bin Haji Wahab melahirkan rasa berbesar hati terpilih mewakili negara.

rasa berbesar hati kerana terpilih sebagai wakil negara untuk menghadiri persidangan berkenaan dan akan memanfaatkan peluang berkenaan untuk mendapatkan ilmu-ilmu melalui perkongsian bersama belia-belia daripada negara yang lain.

Beliau turut berharap rakan-rakan delegasi yang lainnya akan dapat sama-sama mendapatkan pelbagai idea-idea baharu untuk dibawa balik ke Brunei bagi sama-sama membantu memajukan negara.

Selain daripada itu, Abdul Waaliummul Fadzl turut menyatakan mereka juga akan berusaha sedaya upaya untuk mempromosikan Negara Brunei Darussalam kepada belia-belia yang menghadiri persidangan itu nanti.

JENESYS merupakan sebuah program pertukaran belia yang dianjurkan dan ditanggung sepenuhnya oleh kerajaan Jepun sejak tahun 2007 untuk menjalinkan hubungan dua hala dan persahabatan, di samping mempromosi nilai-nilai budaya, adat resam dan memahami cara hidup masyarakat Jepun.

Program tersebut antara lain bertujuan untuk mempromosikan persefahaman dalam kalangan rakyat dan penduduk Jepun dan rantau Asia-Pasifik juga membina asas persahabatan dan kerjasama

bagi masa hadapan. Program tersebut juga dapat menggalakkan pemahaman mengenai ekonomi, masyarakat, sejarah, kepelbagaian budaya, politik dan hubungan diplomatik Jepun.

Para peserta ini nanti akan dibahagikan kepada lima kumpulan mengikut tema yang disediakan oleh pihak penganjur, iaitu *Over Tourism and Sustainable Tourism Development, Foreign Workers, Quality Education, Food Loss* dan

Awareness of Disaster Mitigation.

Mereka juga akan berpeluang untuk membuat lawatan ke Tokyo, Kyoto, Aichi, Osaka dan Miyagi, di mana kumpulan-kumpulan tersebut akan mengikuti beberapa aktiviti, seperti bengkel dan mendengarkan taklimat mengenai tema yang ditetapkan, membuat kunjungan hormat kepada Kementerian Luar Negeri Jepun, membuat lawatan ke tempat-tempat menarik dan bersejarah di Jepun.



DOA Selamat dibacakan bagi para perwakilan belia yang menyertai JENESYS 2019 Inbound Program Students Conference, yang diadakan selama sepuluh hari, bermula 9 hingga 18 Februari 2020 di Tokyo, Jepun.

Sertai Perhimpunan Pengakap Antarabangsa Sharjah



KETUA Pesuruhjaya Pengakap menyerahkan bendera kebangsaan kepada Ahli Pengakap Kelana dari Pasukan Pengakap Kelana 1102 Universiti Islam Sultan Sharif Ali (UNISSA) yang juga mahasiswa UNISSA ke Perhimpunan Pengakap Antarabangsa Sharjah Kali Ke-9.

Berita dan Foto : Ihsan Khairul Salleh

BANDAR SERI BEGAWAN, Sabtu, 8 Februari. - Persekutuan Pengakap Negara Brunei Darussalam menghantar seorang Ahli Pengakap Kelana dari Pasukan Pengakap Kelana 1102 Universiti Islam Sultan Sharif Ali (UNISSA) yang juga mahasiswa UNISSA, iaitu Abdul Rahim bin Haji Iedin Roslan, pelajar Tahun 1 Program Ijazah Sarjana Muda Undang-Undang dan Ijazah Sarjana Muda Perundangan Syariah, Fakulti Syariah dan Undang-Undang, UNISSA untuk menyertai jempunan Perhimpunan Pengakap Antarabangsa Sharjah

Kali Ke-9 bagi membincangkan tema program, bertajuk Pengakap dan Toleransi yang diadakan di Sharjah, Emiriyah Arab Bersatu bermula 10 hingga 19 Februari 2020.

Perhimpunan Pengakap Antarabangsa itu diadakan, antara lain bertujuan untuk mengeratkan hubungan silaturahim, memperluaskan pengetahuan dan berkongsi idea dan pengalaman, pertukaran budaya juga menambah ilmu kepengakapan dalam kalangan Ahli-ahli Pengakap Kelana dari negara-negara yang

menyertainya.

Selain daripada itu, setiap peserta dikehendaki menyediakan pembentangan laporan mengenai tema program, iaitu Pengakap dan Toleransi yang dijalankan oleh Persekutuan Pengakap di negara masing-masing, Sharjah untuk semua dan semua untuk Sharjah juga menjawab ujian kefahaman secara dalam talian (*online*) Sesi Selamat daripada Bahaya.

Program perhimpunan tersebut ditanggung sepenuhnya oleh Ahli Majlis Tertinggi Emiriyah Arab Bersatu, Tuan Yang Terutama Shaik Dr. Sultan bin Mohammad El-Qasemmi; dan Gabenor Sharjah, Tuan Yang Terutama Shaik Dr. Sultan bin Mohammad El-Qasemmi.

Penyertaan bagi jempunan program berkenaan adalah Penyertaan Kali Ke-8, di mana Persekutuan Pengakap Negara Brunei Darussalam menghantar seorang Ahli Pengakap Kelana bagi menyertainya.

Satu majlis bagi mengucapkan selamat berlayar dan penyerahan bendera kebangsaan disampaikan oleh Ketua Pesuruhjaya Pengakap, Haji Badar bin Haji Ali kepada Abdul Rahim, yang diadakan di Ibu Pejabat Persekutuan Pengakap Negara Brunei Darussalam, Jalan Gadong.

Kes Pertama Positif Coronavirus warga tempatan - PALSU!

Siaran Akhbar : Kementerian Kesihatan

BANDAR SERI BEGAWAN, Sabtu, 8 Februari. - Berikutan dengan penyebaran maklumat dari Twitter melalui seorang yang bernama 'Angula' yang menyatakan terdapat Kes Pertama Positif Coronavirus di Negara Brunei Darussalam yang dihadapi oleh seorang warga tempatan yang pulang dari Republik Rakyat China selepas menyambut Tahun Baharu Cina di negara tersebut, di mana tular di media sosial melalui *Twitter, Whatsapp* dan *Facebook*, kementerian ini ingin menjelaskan bahawa penyebaran maklumat tersebut adalah tidak benar dan disebarkan oleh pihak yang tidak bertanggungjawab.

Oleh yang demikian, orang ramai adalah dinasihatkan untuk tidak berasa cemas dengan penularan maklumat yang tersebar tersebut. Setakat ini, tidak ada kes jangkitan Coronavirus baharu (2019-nCoV) didapati di Negara Brunei Darussalam. Kementerian Kesihatan ingin menasihatkan kepada orang ramai supaya tidak mudah terpedaya dan percaya akan maklumat-maklumat dan berita yang disebarkan melalui *internet* atau melalui media-media lain seperti *Whatsapp, Twitter* dan *Facebook* tanpa memastikan kesahihannya. Seterusnya orang ramai juga diperluaskan untuk lebih bertanggungjawab dan tidak turut menyebarkan sebarang perkara yang tidak disahkan oleh kementerian ini.

Perbuatan menyebarkan maklumat tidak sah, apatah lagi yang palsu dan direka oleh mereka yang semata-mata berniat untuk mengelirukan adalah menjadi kesalahan dan boleh dilaporkan di bawah perundangan Akta Ketenteraman Awam, Penggal 148 (Public Order Act, Cap 148) Seksyen 34, iaitu sesiapa yang sama ada menggunakan lisan atau tulisan atau menggunakan sebarang cara, menyebarkan laporan yang salah atau membuat kenyataan yang salah, yang menyebabkan ketenteraman awam terganggu boleh dipenjarakan tiga tahun dan denda sebanyak BND3,000.

Untuk maklumat lanjut, orang awam boleh melayari laman sesawang Kementerian Kesihatan, www.moh.gov.bn atau menghubungi menerusi Talian Nasihat Kesihatan di +673 238 1380 atau +673 238 1383 atau Talian Darussalam 123.